

# АКАФИСТ ПРАВЕДНОЙ СОФИИ, КНЯГИНИ СЛУЦКОЙ

## Тропарь, глас 5

Святая праведная мати наша Софие,/ нетлением мощей и чудес сиянием почти тя Бог;/ поминающе твое праведное житие,/ тя молим испросити/ телесем нашим здравие// и душам спасение.

## Кондак, глас 4

Приидите, вси русстии жены/ святую Софию восхвалим,/ уподобившуюся мудрым девам,/ елей благодати Духа Святаго стяжавшую;/ темже умудри тя Господь/ подвизатися во утверждении святыя Православныя веры/ и соблюдати Церковь Его/ непозыблему от ересей и расколов,/ сего ради благодарне воспоим ти:/ радуйся, града Слуцка и вся земля наша// радости и утверждение.

## Величание

Величаем тя, святая праведная мати наша Софие, и чтим святую память твою, ты бо молиши за нас Христа Бога нашего.

*Акафист.*

## Кондак 1

Избранную от рода князей Слуцких и Киевских и нетлением мощей прославльшуюся, омраченным языком заблуждениями прелести божественный свет облиставшую, ты, святая Софие, песнями почитаем. Ты же, яко имущая дерзновение ко Господу, от всяких нас бед свободи, да зовем ти: Радуйся, Софие, земли православныя радости и утверждение.

## Икос 1

Ангелов Творец и Господь Сил избра тя, святая Софие, от чрева матерня, яко поборницу и заступницу веры православныя на земли Слуцстей, сего ради мы зовем ти сице:

Радуйся, веры православныя заступнице.

Радуйся, за нас пред Богом ходатаице.

Радуйся, мудростию духовною сродники своя удивившая.

Радуйся, землю Слуцкую сохранившая.

Радуйся, древо чудоточное рода древняго.

Радуйся, саде земли обетования.

Радуйся, звездо светозарная.

Радуйся, лозо добродетельная вертограда Христова.

Радуйся, святыни чистое жилище, Богом зданное.

Радуйся, радости исполнение.

Радуйся, цвете смирения.

Радуйся, добродетелей украшение.

Радуйся, Софии, земли православных радости и утверждение.

## Кондак 2

Видяще людие православнии, яко сила Божия в немощи твоей совершается, егда осиротела еси, Отцом Небесным и Материю Божией не оставлена была еси, взываху Богу: Аллилуиа.

## Икос 2

Разум недоразумевает разумети, како ты во младенстве своем явися помощница и покровительница людем православным, егда покорися воле опекунов твоих, яко воле Божией, и изволи мужа имети, мы же взываем ти сие:

Радуйся, детище, всякия благодати исполненное.

Радуйся, во младенстве осиротевшая.

Радуйся, злым людям на воспитание отданная.

Радуйся, любовь и злобу человеческую победившая.

Радуйся, кротость и смирение явившая.

Радуйся, надежду на Бога положившая.

Радуйся, в послушании воспитанная.

Радуйся, нас послушанию научающая.

Радуйся, в бедах и напастех скорая помощнице.

Радуйся, младенцев и сирот добрая хранительнице.

Радуйся, веру и любовь стяжавшая.

Радуйся, всем просящим помощь подающая.

Радуйся, Софии, земли православных радости и утверждение.

## Кондак 3

Силу веры твоя нам являя, новое испытание посла тебе Господь, егда опекуны твои, хотяще обручение расторгнути, вызваша брань с князем Радзивиллом, ты же, праведная София, единому Богу открывала еси сердце свое, молящи о мире и взывающи: Аллилуиа.

## Икос 3

Имуще смирение велие, от юности посягнувши за иноверца, бысть княгиня София истинная заступница веры православных, основательница монастырей, строительница церквей на земли Слуцстей, сего ради зовем ей сие:

Радуйся, храмов Божиих зиждительнице.

Радуйся, обителей иноческих попечительнице.

Радуйся, верность Церкви и стране сохранившая.

Радуйся, заповедь любви не нарушившая.

Радуйся, суетную мудрость посрамившая.

Радуйся, заботу о людех положившая.

Радуйся, молитвы к Богу приносящая.

Радуйся, под покровом Божия Матери живущая.

Радуйся, страдания смиренно претерпевшая.  
Радуйся, о ближних твоих не забывшая.  
Радуйся, княжество твое венцем духовным увенчавшая.  
Радуйся, веру православную укрепившая.  
Радуйся, Софии, земли православных радости и утверждение.

#### **Кондак 4**

Бури и нестроения претерпе земля Белорусская, егда врази льстивии хотяху принудити люди православных ко унии, и мы не разумеем, како вера твоя велия сохрани землю Слуцкую от ересей и расколов в чистоте Православия, еже видяще, благодарственно вопием Богу: Аллилуиа.

#### **Икос 4**

Слыша житие твое, страданиями исполнено, восхваляем труды твоя, во славу Божию понесенная по защите правоверия. Ты стена нерушимая еси для Церкви Христовы на земли Слуцстей, и мы, взывающе, вопием Ти сице:

Радуйся, страдания претерпевшая.  
Радуйся, плоды бессмертия стяжавшая.  
Радуйся, святых отцев предания сохранившая.  
Радуйся, веру Христову прославившая.  
Радуйся, щите благочестия.  
Радуйся мечу на злочестие.  
Радуйся, Закон Божий утвердившая.  
Радуйся, дары Духа Святаго стяжавшая.  
Радуйся, образ кротости показавшая.  
Радуйся, ленивых подвигнувшая.  
Радуйся, от мятежа и брани защищающая.  
Радуйся, от гибели избавляющая.  
Радуйся, Софии, земли православных радости и утверждение.

#### **Кондак 5**

Боготечней звезде уподобилася еси, Софии, яко многия приведе ко Христу, ищущия спасения, и соделалася аки мати премудрая людям православным, защита их и покров, темже убо и мы вопием Богу: Аллилуиа.

#### **Икос 5**

Видя в тебе, княгине Софии, заступницу благочестия, краль издаде грамоту не принуждати христиан православных ко унии на земли Слуцстей, мы же радостию взываем к тебе сице:

Радуйся, милости сокровище.  
Радуйся, промышлений о людех приятелище.  
Радуйся, ненадежных надеяние.  
Радуйся скорбящих попечение.  
Радуйся, за землю нашу пред Богом ходатаице.

Радуйся веры нашея украшение.  
Радуйся, право стоящих утверждение.  
Радуйся, падающих крепкое возведение.  
Радуйся, на путь верный возвращающая.  
Радуйся, чудеса совершающая.  
Радуйся недуги исцеляющая.  
Радуйся, враги укрощающая.  
Радуйся, Софии, земли православныя радости и утверждение.

### **Кондак 6**

Проповедует весь мир христианский тебе яко звезду незаходимую на небосклоне церковнем и твое всегдашнее заступление о женах родящих, сиротах и младенцах; мы же взываем к Богу: Аллилуиа.

### **Икос 6**

Возсияла еси всему миру своими добродетельми, егда прияла еси болезни велия в рождении чада своего и смерть, мученический венец получивши от Бога, мы же вопием ти сие:

Радуйся, Царем Небесным возвеличенная.  
Радуйся, Божию Материю прославленная.  
Радуйся, надеждою на Бога верных укрепившая.  
Радуйся, венец мученический получившая.  
Радуйся, женам и младенцам защитнице.  
Радуйся, в рождении чад помощнице.  
Радуйся, слабым утешение.  
Радуйся, болящим отрадо.  
Радуйся, Церкви служительнице.  
Радуйся, вечныя жизни наследнице.  
Радуйся, сосуде правоверия.  
Радуйся, защитнице православия.  
Радуйся, Софии, земли православныя радости и утверждение.

### **Кондак 7**

Хотя прославити княгиню Слуцкую Софию, Господь яви святость ея, открыв тоя нетленныя мощи, мы же, радостию исполнени, прославляем Бога, благодарно Ему поюще: Аллилуиа.

### **Икос 7**

Новую ходатаицу показа нам Господь ты, святая праведная Софии, прославлением нетленных мощей твоих и чудес сиянием, от сих исходящих. Ты ныне во граде Минске почиваеши, пред Престолом Вседержителя молитвы возносиши и, яко воевода, землю нашу защищаеши, и мы вопием ти сие:

Радуйся, источнице милосердия.  
Радуйся, ходатаице нашего спасения.  
Радуйся, сокровище веры православных.  
Радуйся, защитнице благочестия.  
Радуйся, сиянием мощей своих землю нашу просветившая.  
Радуйся, всех нас себе усыновившая.  
Радуйся, милость посылающая.  
Радуйся, врачей благословляющая.  
Радуйся, болящим чадам радость возвращающая.  
Радуйся, сирот своим покровом покрывающая.  
Радуйся, всех матерей упование.  
Радуйся, покрове наш и заступление.  
Радуйся, Софии, земли православных радости и утверждение.

### **Кондак 8**

Странное чудо является прибегающим к блаженной Софии: молитвами своими ограждает от всякого зла, учит мудрствовать горняя, а не дольная, и пети Богу: Аллилуиа.

### **Икос 8**

Вся еси, Софии, на небеси, но и нас не оставляеши, покрываеши бо молитвою твоею люди православных, сего ради, яко скорой помощнице и хранительнице нашей вопием ти сице:

Радуйся, жития нашего украшение.  
Радуйся, чудес сияние.  
Радуйся, сонм Русских святых пополнившая.  
Радуйся, землю Белорусскую благодатию исполнившая.  
Радуйся, земли Слуцкого покровительнице.  
Радуйся, стольного града Минска наследнице.  
Радуйся, христианскою любовью нас исполняющая.  
Радуйся, мир в души посылающая.  
Радуйся, на Бога упование возлагати нас научающая.  
Радуйся, добродетельми нас одаряющая.  
Радуйся, житие наше освящающая.  
Радуйся, помощь нам подающая.  
Радуйся, Софии, земли православных радости и утверждение.

### **Кондак 9**

Всякия беды, скорби, напасти избавляеши, велия наша помощнице Софии, страдания душ облегчаеши, молитве и посту научаеши всех, хотящих жати спасение, внегда пети сице: Аллилуиа.

### **Икос 9**

Ветии многовещаннии недоумеют славити святую Софию, яко малым своим житием

многих даров сподобися, мы же, восхваляюще ю, вопием сице:

Радуйся, даров духовных подательнице.  
Радуйся, в житейском мори наша заступнице.  
Радуйся, путь злу преграждающая.  
Радуйся, любовью наша сердца исполняющая.  
Радуйся, звездо заповедей Божиих негасимая.  
Радуйся, книго мудрости совершенная.  
Радуйся, чудеса дивными просиявшая.  
Радуйся, гнев Божий на милость претворяющая.  
Радуйся, душу свою за ближних положившая.  
Радуйся, путь в Царство Небесное указавшая.  
Радуйся, маслино, елей милости изливающая.  
Радуйся, винограде, благочестия вино источающая.  
Радуйся, Софии, земли православных радости и утверждение.

### **Кондак 10**

Спаси хотя люди православныя, посла Господь Бог тя, Софии, да твоими молитвами устроиши житие наше, козни вражия разрушиши, чародеяния и волхования запретиши, ярость и вражду укротиши, да чистым сердцем воспоим Богу: Аллилуиа.

### **Икос 10**

Стена еси всем прибегающим к тебе, Софии, точиши бо исцеления от нетленных мощей твоих, помощь подаеши молящимся, да и мы вопием ти сице:

Радуйся, горлице небесная.  
Радуйся, голубице Христова красная.  
Радуйся, упование непостыдное.  
Радуйся, любви совершенная.  
Радуйся, в бедах заступнице.  
Радуйся, в напастех защитнице.  
Радуйся, надежду посылающая.  
Радуйся, веру в Бога возвращающая.  
Радуйся, от мятежа и брани соблюдающая.  
Радуйся, от нужд и нищеты свободящая.  
Радуйся, страсти душевныя пожигающая.  
Радуйся, благия помыслы в сердце полагающая.  
Радуйся, Софии, земли православных радости и утверждение.

### **Кондак 11**

Пения и благодарения приносим ти, Софии, уподобившейся премудрому Соломону, яко даде нам тобою Господь образ премудрости, да хваляще тя, вопием Богу: Аллилуиа.

### **Икос 11**

Светозарней луче уподобилася еси, Софие, просвещаеши бо умы наша, помощь в учении подаеши, тьмы и вечных мук нас избавляеши, да вопием ти сице:

Радуйся, младенцем уста отверзающая.  
Радуйся, отроком в учении помогающая.  
Радуйся, старцев укрепляющая.  
Радуйся, путь к Богу указующая.  
Радуйся, умы просвещающая.  
Радуйся, премудрость Божию подающая.  
Радуйся, целомудрию научающая.  
Радуйся, к покаянию призывающая.  
Радуйся, души озаряющая.  
Радуйся, мудрость мира сего посрамляющая.  
Радуйся, елей благодати Духа Святаго собравшая.  
Радуйся, девам мудрым уподобившаяся.  
Радуйся, Софие, земли православныя радости и утверждение.

### **Кондак 12**

Благодать от Бога получивши, не лиши нас твоих молитв, Софие, да и мы сподобимся даров небесных и земных, и Царствия Небеснаго причастницы будем, благодаряще Бога: Аллилуиа.

### **Икос 12**

Поюще святость твою, Софие, восхваляем стояние твое в вере православней, прославляем чудеса твоя и зовем ти сице:

Радуйся, архиереев умудряющая.  
Радуйся, правителем помогающая.  
Радуйся, воинов укрепляющая.  
Радуйся, страну нашу защищающая.  
Радуйся, земли православныя украшение.  
Радуйся, ангелов собеседнице.  
Радуйся, славный свой род не посрамившая.  
Радуйся, дела своих предков прославившая.  
Радуйся, злая сердца умягчающая.  
Радуйся, душу преображающая.  
Радуйся, ум озаряющая.  
Радуйся, дух укрепляющая.  
Радуйся, Софие, земли православныя радости и утверждение.

### **Кондак 13**

О святая праведная мати наша Софие, княгине Слуцкая, нынешнее наше прими моление и твоими молитвами избави нас от всяких напастей и бед, болезней и скорбей, нашествия иноплеменных и будущия изми муки, да радостию Богу возопиим: Аллилуиа.

*(Этот кондак читается трижды, затем икос 1, кондак 1)*

### ***Молитва***

**О**, святая праведная мати наша, блаженная княгине Софии, прими милостивно приношение веры, надежды и любви нашей и вознеси е ко Господу, и якоже в земнем животе твоём была еси помощница и заступница всем Православным христианом земли твоея, тако и ныне укрепи нас твердо и непоколебимо до смерти стояти за веру Православную, согрей сердца наша любовью ко Господу и Пречистой Его Матери. Умоли Христа Бога нашего, да сохранит Церковь Свою святую от расколов и ересей, да утвердит в ней дух правыя веры и благочестия, дух ведения и любви, дух мира и радости вечныя, да вся чада ея духом и истиною поклоняются Ему, да укрепит верных в благочестии и святости жизни, да обратит отпадших от Православныя Церкви во святыя недра ея.

**О** святая мати, града Слуцка похвало и радости, умоли Господа, да избавит град твой и всю страну нашу от глада, труса, потопа, огня, меча, нашествия иноплеменных и междоусобныя брани, от смертоносныя язвы, да низпослет правителем нашим усердие, мудрость и верность, да управляют и судят по воле Его, да хранят установления Святыя Церкви. Испроси всем с верою притекающим к раце святых мощей твоих мирное житие, тишину, просвещение умов и сердец, соблюди их от козней вражиих, от соблазнов мира, во зле лежащаго, и от всякия скорби и нужды, обрати нас к покаянию и исправлению, даруй заблудшим истины познание, недугующим исцеление. Сохрани нас благодатными твоими молитвами от всех врагов видимых и невидимых и избави от всякаго зла, да прославим во вся дни жизни нашея Отца и Сына и Святаго Духа и твое заступление во веки веков. **Аминь.**